

T V R C I C V M I M P E R I V M.

TVRCICI Imperij originem, incrementum, & quomodo paulatim in hanc (qua hodie nobis minari videtur) magnitudinem excreuerit; his paucis, ex nostri temporis Historiographis Lectori excerptimus. Anno à Christo nato. M. CCC. OTTOMANNVS Turca quidam Zichi filius, tenuis conditionis homo, nomen & dignitatem, ob ingenium, & rei militaris peritiam, inter Turcas habere cœpit. Hic nomen Turcarum Imperatorum familiæ dedit; & primus eorum Regem se constituit. Et. xxviii. Annis, quibus imperauit, Bithyniam & Cappadociam obtinuit. Plurimaque loca munita Pontico Mari adiacentia occupauit. Huic successit filius ORCHANES, hic Prusiam amplissimam Urbem expugnauit, Regniq̃ue caput fecit: A Tartaris vigesimo secundo Regni Anno, infeliciter pugnans, occiditur; filiumq̃ue AMVRATHEN Imperio reliquit, qui à Græcis dissidentibus euocatus, primus ex Asia in Europam traiecit; Callipolim & Cherronesum cepit; Abydum superat. Philippopoli & Hadrianopoli Urbibus in potestatem redactis, Seruia Bulgariaq̃ue nobis adempta, Superiorem Mysiam ingressus, obiit, pugione percussus; Imperij Anno vigesimo tertio. Cuius filius BAI AZETES fratre occiso, magnam Thraciæ partem occupauit; totam ferè Græciam subegit; & Phocidem Bulgariæ partem. sed victus à Tamberlano, inglorius obiit. Capto patre, CALEPINVS filius Regnum obtinuit. & quum Sigismundum bello funditus deturbasset, Imperatorisq̃ue Constantinopolitani fines deuastare cœpisset, in ipso ætatis flore obiit; cùm sex annis imperasset. MAHOMETES post hunc Imperium arripuit, qui Valachis asperrium bellum intulit; maiorem partem Slauoniæ subegit; primus Danubium traiecit; Macedoniam perdomuit: & ad Ionium vsque pelagus peruenit. Translato Regia sede ex Bithynia Hadrianopoli posuit, vbi è vita excessit, decimo quarto Imperij anno. Hinc AMVRATHES. II. Regendi munus subiit. Hic obtinuit Epirum, Ætoliam, Achaiam, Bœotiam, Atticam, & Thessalonicam Venetæ ditionis urbem. Huic succedit MAHOMETES II. qui Athenas euertit. Constantinopolim. 29. die Maij Anno. 1452. expugnauit. Trapezuntium Imperium suæ potestati subiecit. Corinthum cepit. Lemnum, Euboeam, & Mitylenem Insulas bello subegit. Capham Urbem Genuensium deuicit. Præfuit is Imperio. 32. Annis. BAI AZETES. II. bellum in Venetos gessit; eisq̃ue Naupactum, Methonem, Dyrrachiumq̃ue abstulit; Dalmatiamq̃ue omnem depulatus est: obiit veneno. Huius filius ZELIMVS Imperium inuasit. Hic Alcairo munitissima Ægypti Vrbe expugnato, Sultanoq̃ue cæso, Alexandriam, totamq̃ue Ægyptum suo Imperio subdidit. Damascum cepit. SOLYMANNVS vnicus Zelimi filius suffectus est patri, Belgradum expugnauit; Budam Regiam Urbem occupauit, Strigoniumq̃ue. Hungariam ferè totam deuastatus, Rhodum Insulam deditione obtinuit, Quinquelesias euertit. Iula Vrbe capta, Zigethum obsedit; in obsidione obiit. quam filius Zelymus. II. Imperij hæres diripuit Anno. 1566. Atque hoc modo sub vndecim Imperatoribus ducentis sexaginta annis magnam Africæ, maiorem Europæ, & maximam Asiæ partem, turcica tyrannide sibi subiugarunt. Sed qui harum historiarum cognitionem pleniorē desiderat, legat Paulum Iouium; Christoferum Richerium Senonem; Cuspiniahum; Bapt. Egnatium; Gilb. Nozorenium; Andream Lacunam; Pium. II. cap. 4. Europæ; & ceteros Turcicarum rerum scriptores.

Turcarum originem, Ottomannorumq̃ue prosapiam diligentissimè
descripsit Laonicus Chalcocondiles.